

## La cooperazion pel venjer ence contra la mafia

Tel chèder de la serèdes endrezèdes col Pian di Joegn La Risola dal Fassa Coop l'é stat prejentà l'esperienza preziosa envièda via te la Locride da mons. Bregantini

**Poza** - La formula é scempia e se la enten jà da la parola: "cooperèr", donca lurèr adum. L'é chest l secret per poder ge tegnir poz a la dificolteades e manèr inant ativitèdes percacentes, pean via da l'idea che l'economia pel garatèr demò se stèsc ben duta la comunanza olache vegn portà inant l'atività. L zil de la trei scontrèdes endrezèdes chisc dis passè dal Fassa Coop con La Risola l'era apontin chest: ge fèr cognoscer e entener a nesc joegn la forza e la potenzialità de la gran endsfida peèda via con don Lorenzo Guetti a la fin del 1800, che ge à permetù a noscia jent de passèr fora mingol più sorì i tempes senestres de la veres.

Dò aer prejentà la realtà de la cooperazion en general e si e jempies concrec te noscia val, la terza scontrèda a la Malga Aloch à portà dant na esperienza dassen straordenèra: chela che à portà la realtà de la cooperazion enscin ti lesc de la mafia, didan chela jent a poder sperèr te n davegnir desferent e a se librèr da la sotmision ti confronc del "clan".

La cooperazion l'é na forma economica che per solit la é leèda al teritorie - à spiegà l relator Michele Odorizzi, vizepresident de la Federazion Trentina de la Copratives, con n percors lonch tel setor del volontariat - e tel Trentin chest conzet fèsc pèrt de noscia reijes. L'é più cert la troèr en Calabria, olache culturalmenter no i é usé e donca i stenta de più a se meter ensema. Ma ence chiò l leam reiona trentin: l'é stat defat monsegnor Giancarlo Bregantini, che era stat manà te chi pajjes de la Locride olache la 'ndrangheta comana e dezide dut, a proponer l'esperienza de lurèr adum che l'aea respirà e vivù te nesc pajjes. L'à envià n grop de sia parochies



Michele Odorizzi e Chiara Simoncelli à prejentà a Poza esperienzes straordenères de cooperazion contra la mafies.

a vegnir tel Trentin a veder coche va inant nesc consorzies de produzion de fruc, fajan entener che "se pel". Te la Calabria l'é stat endrezà coltivazions de picoi fruc e ades chesta esperienza l'à ciapà pe e la se à slarià fora: i é rué a n faturat de 50 milions a l'an, presciapech 500 persones vif de chest e l'é stat creà na rei de distribuzion che passa fora la Tèlia da japede fin sunsom. Per la Val di Mochegn, che al scomenz aea tout pèrt a chesta sort de fradaa demò per solidarità, ades chela copratives de la Calabria l'é doventà partners de valuta, e la produzion de fruc che rua da chi raions da mont desche i nesc, ma con na sajonalità desferenta, é dassen utola e emportanta.

Ma apepe a l'ejit economic, l'intuizion "geniala" de Bregantini e l'ejit de chesta esperienza à abù



l gran merit de "creèr speranza" te chi lesc olache vadagnèr per n privat l'é dassen senester. E l'esperienza de cooperazion l'é doventà coscita na esperienza de libertà.

L segnificat e la forza de chesta scomenzadives é cresciuda amò de più canche l'é stat metù sù ence copratives sozièles del consorzio GOEL, per ge sporjer a la jent chi servijes de "welfare", descheche i ge disc ades, che duc à derit de aer, ma che la 'ndrangheta spor desche se fossa n so gran don, per tegnir en sudizion chela jent.

E n gran vèrch inant é stat fat amò - à spiegà Chiara Simoncelli - canche del 1996 con la lege 109 (lege de scomenzadiva populèra) l'é stat integrà la "lege Pio La Torre" del 1982 su la confisca di bens a la mafia, fajan fora che chisc bens ge vegne dac de return a la comunanza. Da chiò l'é nasciù "Libera. Associazioni, nomi e numeri. Contro le mafie" che, pur no senza problemes, dificolteades e pericoi, la é dò a portèr inant ti terens socastré a la mafia coltivazions e produzioni netes. N lurier che à n valor simboliche straordenèr per la jent da semper usèda a conscidrer la mafia e si sistemèdes desche la soula realtà possibola.

Tegnir i refletores empeé sun chesta realtèdes l'é fundamentèl per les vardèr via colajù, che no les vegne dessatèdes, ma ence percheche nesc joegn sie enjigné a se parèr ence chiò da risesc che no i revèrda semper e demò i etres.



L placat de la scomenzadiva metù fora a l'entrèda de la Malga Aloch.

Lucia Gross

## L'é a la leta "Agorà"

L'é tanche vegnù fora l secont numer del sfoi di studenc de la scola auta de Fascia

**Scola** - Via per de mèrz l'é vegnù fora l secont numer de Agorà, l sfoi di studenc de la scola auta de Fascia, n numer che se averc con vèch referiment ai 150 egn de l'unità de la Tèlia, moscèda su la soracuerta col stivèl dai trei colores ros bianch e vert utà sotessora.

Chesta edizion porta dant contegnui dassen "esplosives", descheche se lec te l'editorial del professor Germano Basile. Te 28 plates fornides ence con fotografies e dessegnes gustègoi realisè dai studenc de l'Istitut d'Èrt, se pel troèr na gran varietà de argomenc svilupé per talian ma ence con vèch contribut per ladin. Ambient, zitadinanza, identità culturala, cosmopolitism, istituzions di studenc: chesta la componetes bones de engaisèr i letores a se l vardèr con gust e curiosità.


Desche zenza se pel troèr i spazies de interazion ludica, oramai consolidé, desche "dilloatutti" e la vignetes satiriches.

Segur de gran valuta l'é l'enrescida che à uzà fora n cajo de roina ambientèla: na lingia de retrac moscia la situazion de dejodech de na promenada enlongia la Veisc. Articolèda e de spessor l'intervista al diretor de l'Istitut Cultural Ladin, Fabio Chiocchetti, che reiona de identità ladina en relazion con l'identità cosmopolita e nazionea.

Chisc i argomenc più de relief ma chest codejel rerserva amò n muie de auter, n articol su Facebook e l fenomen di social network, la recenjion de la mostra de scultures de Amedeo Modigliani al Mart de Rorei, l resocont de n an

passà ti Stac Unii da man de na studenta del liceo, l'empegn di studenc tel projet ski-college e amò conscidrazions e barac de opinions en cont del fenomen di graffiti che à tout ite ence l liceo, n quiz su la personalità, valutazions su la imposizion ai studenc ladinofons de tor pèrt a la lezion de ladin senza poder cerner cheles de derit, la oportunitèdes de la assemblees de clas e no mencia nience mingol de gossip ma no l'é pa dut, ampò se volede n saer de più cognede jir a ve l vardèr!

Del comitat de redazion fèsc pèrt i studenc Fabiana Morandini, Amanda Tomasini, Jacopo Bernard, Luca Pezzini, Daniel Rossi, Chantal Rasom, Giulia Venturis, Clea Iori, Silvia Marchesini, Francesco Riz, Davide Weiss e Martina Soracreppa con i professores Germano Basile, Maurizio Brugnara, Francesco Frizzera e Nicola Parzian. (cri.m)



La soracuerta de "Agorà", l'ultima edizion del sfoi de la Scola de Fascia.

## Se lita per la Frazion de Pera

I capifech é enviè a dèr jù sia stima en domenìa ai 17 de oril da les 9 a les 19

**Litazions** - L'é temp de litazions ence per la Frazion de Pera. En domenìa ai 17 de oril i capifamilia vegn chiamé a dèr jù sia stima per l'ренов del comitat de amministrazione che resta en cèria 5 egn. Pel vegnir litè duc i residenc te la Frazion de Pera, bèsta che no i sie te amministrazione de comun, ence se no i fèsc pèrt de nesciuna lista. N capofech che no pel jir a litèr pel deleghèr un di componenc de maor età de sia familia.

Se pel dèr jù fin a cinch stimes

ma apepe a l'onom e l cognom met pègn recordèr che l'é benfat segnèr ence l sorainom o la data de nasciuda percheche tel cajo de omonimia la stima no à valuta e la jissa donca perduda, descheche l'é sozedù defat ence per la Frazion de Poza.

Se pel jir a litèr da les 9 da doman a les 7 da sera aló da la palestra de la scola populèra "don Edy Cinzoli" te strèda Tita Piaza a Pera; per poder litèr ge vel se tor dò la letra envit che l'é ruà te duta la families de la Frazion.

Sperjes o pomes rostii?  
 No demò TORNACONT,  
 ma ence CALITÀ  
 per poder meter sora desch  
 zeche de bon e san!



MOENA  
 Strada de Prealon 2  
 (vejìn a la circonvallazione)